

Broj: 03/04-05-3-8/13
Sarajevo, 22.03.2013. godine

BOSNA I HERCEGOVINA PARLAMENTARNA SKUPŠTINA BOSNE I HERCEGOVINE SARAJEVO			
Broj:	26.03.2013		
Broj lista	Broj stranice	Broj strana	Broj strana
01-50-1-	15-43	/	13

PARLAMENTARNA SKUPŠTINA BOSNE I HERCEGOVINE

Zastupnički dom

n/p gosp. Nerminu Puriću, zastupniku ✓
n/p gosp. Bojanu Ninkoviću, tajniku

Predmet: Odgovor na zastupničko pitanje

Poštovani,

U privitku akta, dostavljam Vam odgovor Ureda za suradnju i zastupanje pred Ustavnim sudom Bosne i Hercegovine na zastupničko pitanje, koje je na 43. sjednici Zastupničkog doma Parlamentarne skupštine Bosne i Hercegovine, postavio zastupnik Nermin Purić.

S poštovanjem,


SEKRETAR VLADE
Edita Kalajdžić

Bosna i Hercegovina
FEDERACIJA BOSNE I HERCEGOVINE
V L A D A
Ured za saradnju i zastupanje pred
Ustavnim sudom Bosne i Hercegovine
S A R A J E V O

Bosnia and Herzegovina
FEDERATION OF BOSNIA AND HERZEGOVINA
BOSNIA I HERCEGOVINA
Office for Cooperation and Representation before
the Constitutional Court of Bosnia and Herzegovina
S a r a J A J E V O

Broj: 03-1-06-60/13
Sarajevo, 19.03.2013.godine

21.3.2013			
Grupa za jedini	Redni broj	Broj prijava	
03	104-05-3-8	/2013	

FEDERACIJA BOSNE I HERCEGOVINE
VLADA FEDERACIJE BOSNE I HERCEGOVINE
GENERALNI SEKRETARIJAT
n/r gđa Edita Kalajdžić, sekretar Vlade

PREDMET: Zastupničko pitanje - Presuda Evropskog suda za ljudska prava u predmetu Murtić i Čerimović protiv Bosne i Hercegovine, App: 6495/09 od 19.06.2012.godine

Veza: Vaš akt broj: 03/04-05-3-8/13 od 11.03.2013.godine

Poštovana,

Radi postupanja predviđenog odredbama člana 75. Poslovnika o radu Vlade Federacije Bosne i Hercegovine – Prečišćeni tekst ("Službene novine Federacije BiH", broj: 6/10, 37/10 i 62/10), u prilogu akta veze dostavili ste ovom Uredu zastupničko pitanje, koje je, na 43. Sjednici Zastupničkog doma Parlamentarne skupštine Bosne i Hercegovine, obnovio zastupnik Nermin Purić, a koje glasi:

"Kakve pravne posljedice po Federaciju Bosne i Hercegovine proizvodi presuda Evropskog suda za ljudska prava u Strazburu u predmetu "Čerimović i Murtić protiv BiH"? Ima li ta presuda refleksiju na vlasničku strukturu u preduzeću Agrokomerc d.d. Velika Kladaša, te da li su tačne nezvanične informacije po kojima Vlada Federacije BiH razrješenje problema u ovom predmetu vidi u pokretanju stečaja?"

U skladu sa nadležnostima Ureda za saradnju i zastupanje pred Ustavnim sudom Bosne i Hercegovine, dostavljamo vam sljedeći odgovor:

Evropski sud za ljudska prava je u predmetu Murtić i Čerimović protiv Bosne i Hercegovine App: 6495/09 dana 19.06.2012.godine donio presudu kojom je utvrdio povredu prava aplikanta iz člana 6. Evropske konvencije i člana 1. Protokola broj 1. uz Konvenciju, zbog neblagovremenog izvršenja Odluke Doma za ljudska prava broj: CH/00/5134 od 08.03.2002.godine. Odlukom Doma za ljudska prava je naloženo Federaciji BiH da poduzme potrebne mjere i prizna aplikante kao vlasnike internih dionica preduzeća Agrokomerc dd. Velika Kladaša, te da im u odnosu na iznose uplaćene na ime dionica omogući da učestvuju u rukovođenju preduzećem.

Sarajevo, Mula Mustafe Bašeskije broj 6/IV, tel. 650-143, tel/fax. 650-094

Evropski sud za ljudska prava je konstatovao da je Federacija BiH izvršila odluku Doma za ljudska prava, ali da je vremenski period unutar kojeg se ona izvršavala bio predugačak. Iz ovog razloga Sud je utvrdio povredu prava aplikanata, te je naložio tuženoj strani da svakom od aplikanata zbog kršenja navedenih prava na ime nematerijalne štete isplati iznos od 3.600 eura.

Federacija BiH je provela presudu Evropskog suda u pogledu individualnih mjera tako što je na račune aplikanata uplatila dosuđene iznose.

U pogledu generalnih mjera, Ured agenta Vijeća ministara pred Evropskim sudom za ljudska prava je aktom od 12.11.2012.godine informisao Vladu Federacije BiH da smatra da iste nije potrebno provoditi, te da će proslijediti eventualni zahtjev za provođenjem generalnih mjera ukoliko stigne takva obavjest od nadležnih tijela u Strazburu. Do danas, nismo dobili informacije od Ureda agenta Vijeća ministara pred Evropskim sudom o eventualnom zahtjevu za provođenje generalnih mjera.

Dakle, predmetna presuda po Federaciju BiH je imala za posljedicu plaćanje pravične naknade aplikantima Fikretu Murtiću i Raski Čerimović u iznosu od po 3.600 eura na ime nematerijalnih troškova.

U pogledu vlasničke strukture preduzeća Agrokomerc d.d. Velika Kladaša, predmetna presuda nema nikakve refleksije.

S poštovanjem,

Prilog: Akt Ureda zastupnika/agenta Vijeća ministara BiH pred Evropskim sudom za ljudska prava broj: 11-Ap-2/09-772/12 od 12.11.2012.godine

Direktor

mr. Meliha Mujezinović-Katana

Sarajevo, Mula Mustafe Bašeskije broj 6/IV, tel. 650-143, tel/fax. 650-094

BOSNA I HERCEGOVINA

Ministarstvo za ljudska prava i izbjeglice
Ured zastupnika/agenta Vijeća ministara BiH
pred Europskim sudom za ljudska prava

SARAJEVO



BOSNIA AND HERZEGOVINA

Ministry for Human Rights and Refugees
Office of the Agent of the Council of Ministers
before the European Court of Human Rights

SARAJEVO

Broj: 11-AP-2/09-___/12
Sarajevo, 12.11.2012. godine

1 - CG - 178 / 12

BOSNA I HERCEGOVINE
FEDERACIJA BOSNE I HERCEGOVINE

Vlada Federacije Bosne i Hercegovine
N/r premijera g. Nermin Nikšić

Ured za saradnju i zastupanje pred Ustavnim sudom Bosne i Hercegovine
n/r Direktora g. Meliha Mujezinović Katana

PREDMET: Konačna Presuda Evropskog suda za ljudska prava *Murtić i Čerimović protiv Bosne i Hercegovine*, ap. br. 6495/09, dostavlja se na izvršenje

Poštovani,

Dana 19.06.2012. godine Evropski sud za ljudska prava (u daljem tekstu: Sud) donio je presudu u predmetu *Murtić i Čerimović protiv Bosne i Hercegovine*. Na zahtjev Vlade FBiH od 3.9.2012.g. i imajući u vidu okolnosti slučaja u vezi sa izvršenjem odluke Doma podnesen je Zahtjev za podnošenje slučaja velikom vijeću od 18.sept. 2012.g.

Zahtjev nije prihvaćen na na zasjedanju od **22.oktobra 2012.g.** panela od pet sudaca Velikog vijeća, o čemu je država obaviještena 5.11.2012.g. U skladu sa Članom 44. Par. 3 i Pravila 78 Pravila Suda **presuda je konačna**.

Pravne posljedice presude

Država je prema Članu 46. Konvencije obavezna izvršiti svaku presudu donesenu protiv nje u roku od tri mjeseca od dana donošenja presude u pogledu pojedinačnih mjera i isplate pravične naknade.

Nadležne vlasti u Federaciji Bosne i Hercegovine su bile dužne izvršiti Odluku Doma za ljudska prava. Sud je utvrdio u pogledu dopustivosti da je Odluka Doma konačno izvršena 29.oktobra 2007.g. kao što je potvrdio i Ustavni sud BiH (par.18,23 i 24), ali da to nije lišilo aplikante statusa žrtve u odnosu na period u kojem Odluka nije bila implementirana. Sud u pogledu merituma smatra da je period izvršenja bio suviše dug (par. 26-30 presude) i pored činjenice da je bio komplikovan. S toga nalazi da je aplikantima povrijeđeno pravo na pravično sudenje iz Čl. 6. Konvencije i pravo na imovinu, dok pritužbe po članu 13. Konvencije nije razmatrao u meritumu.

Aplikanti su zatražili iznos od po 50.000 , 00 EUR na ime nematerijalne štete . Sud je naložio da se aplikantima isplati iznos od po 3.600 EUR na ime nematerijalne štete, zajedno sa svim porezima koji se mogu zaračunati na taj iznos.

Obaveze Vlade Federacije

Zstupnik VM pred ESLJP dužan je sve konačne presude proslijediti na izvršenje nadležnim tijelima . U predmetnom slučaju domaće nadležno tijelo je Vlada Federacije BiH koja je implementirala Odluku Doma .Prijevod presude dostavljen vam je ranije .


S toga vas pozivamo da obezbjedite i isplatite aplikantima po 3600 KM po navodima presude i dosadašnjoj praksi i dostavite nam kojpiju dokumenata o uplati . Smatramo da generalne mjere nije potrebno provoditi , a ukoliko budemo obavješteni o suprotnom od nadležnih tijela iz Strasbourga proslijedit ćemo vam eventualne takve zahtjeve .

Uz poštovanje ,

Prilog :

Pismo registrara Suda – EN

Zahtjev za preispitivanje od 18.sept. 2012.g. BS


**Zamjenik zastupnika Vijeća ministara BiH
pred Evropskim sudom za ljudska prava
Zikreta Ibrahimović**



BOSNA I HERCEGOVINA
VIJEĆE MINISTARA
Generalno tajništvo

Broj: 05-50-1-1245/13
Sarajevo, 25.4.2013. godine

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 29-04-2013

Organizaciona jedinica	Klasifikaciona oznaka	Redni broj	Broj priloga
		01-50-1-15-	43/13

PARLAMENTARNA SKUPŠTINA BiH

- Zastupnički dom -

SARAJEVO

PREDMET: Odgovor na zastupnička pitanja – dostavlja se

Vijeće ministara Bosne i Hercegovine, na 47. sjednici održanoj 25.4.2013. godine, utvrdilo je Odgovor na pitanja koja je postavio Nermin Purić, zastupnik u Zastupničkom domu Parlamentarne skupštine Bosne i Hercegovine.

U prilogu prosljeđujemo Odgovor radi njegovog dostavljanja zastupniku.

S poštovanjem,

GENERALNI TAJNIK
Zvonimir Kutleša





**BOSNA I HERCEGOVINA
VIJEĆE MINISTARA**

Broj: 05-50-1-1245/13
Sarajevo, 25.4.2013. godine

Nermin Purić, poslanik u Predstavničkom domu Parlamentarne skupštine Bosne i Hercegovine, na 43. sjednici održanoj 28.2.2013. godine, postavio je sljedeća poslanička pitanja:

„1. Šta je Ministarstvo za ljudska prava i izbjeglice poduzelo u okviru svojih nadležnosti s ciljem okončanja procesa povratka i omogućavanja održivog povratka povratnicima srpske nacionalnosti u Unsko-sasnom kantonu, posebno u općinama Bosanski Petrovac i Sanski Most? Zanima me dakle koji su projekti aktualni u tom smislu?

2. Dokle se došlo sa ostvarivanjem strateških ciljeva iz revidirane Strategije Bosne i Hercegovine za provedbu Aneksa VII Dejtonskog mirovnog sporazuma?“

Na postavljeno pitanje, Vijeće ministara Bosne i Hercegovine je na 47. sjednici održanoj 25.4.2013. godine, utvrdilo sljedeći

1. ODGOVOR

U skladu sa *Zakonom o ministarstvima i drugim organima uprave Bosne i Hercegovine*, Ministarstvo za ljudska prava i izbjeglice Bosne i Hercegovine, pored ostalog, nadležno je za kreiranje i provođenje politike BiH u oblasti povratka izbjeglica i raseljenih osoba u BiH, projekata rekonstrukcije i osiguranja drugih uslova za održivi povratak.

Ministarstvo je, također, nadležno za koordiniranje, usmjeravanje i nadzor u okviru Komisije za izbjeglice i raseljene osobe, aktivnosti entiteta i drugih institucija u BiH odgovornih za provođenje politike u ovoj oblasti.

Komisija za izbjeglice i raseljene osobe Bosne i Hercegovine uspostavljena je na osnovu *Zakona o izbjeglicama iz BiH i raseljenim osobama*, a u skladu sa čl. 23. Zakona, Komisija je, naročito, nadležna za odobravanje projekata rekonstrukcije i povratka, koje Ministarstvo za ljudska prava i izbjeglice prikupi i prosljedi Komisiji na razmatranje i odobravanje zajedničkih projekata, koji se realiziraju kroz Fond za povratak.

Udruživanjem proračunskih sredstava za potrebe izbjeglica, raseljenih osoba i povratnika, u periodu od 2008 – 2010. godine osigurano je preko 150 mil. KM, od kojih se 72% odnosi na budžetska izdvajanja institucija BiH putem Ministarstva za ljudska prava i izbjeglice i Fonda za povratak, po 13% osigurali su entiteti iz svojih budžeta, a 2% za ove namjene udružila je Vlada Brčko distrikta BiH.

Svojim odlukama, Komisija za izbjeglice i raseljene osobe BiH je osigurana sredstva rasporedila za implementaciju zajedničkih projekata u BiH, od čega oko 80 mil. KM ili 53% na području FBiH, oko 67 mil. KM ili 44% na području RS, a oko 4,5 mil ili 3% na području Brčko distrikta BiH.

Ovim zajedničkim projektima, obuhvaćeno je više od 100 općina od kojih je preko 60 iz FBiH, preko 50 iz RS, te Brčko distrikt BiH.

Po konkretnom pitanju u vezi **općina Unsko-sanskog kantona Bosanski Petrovac i Sanski Most**, za sanaciju individualnih stambenih jedinica povratnika srpske nacionalnosti, u okviru "ZP08", "ZP09" i "ZP10" izdvojeno je ukupno 1.550.000KM, od kojih 1.000.000KM za Bosanski Petrovac, a 550.000,00KM za Sanski Most.

U Bosanskom Petrovcu, također je obnovljena jedna zgrada sa dva direktna korisnika, a realizovano je oko 180.000KM.

Završeni su projekti elektrifikacije lokacije/objekata realizovanog povratka "ZPE08" u Sanskom Mostu, mikrolokalitet Bosanski Milanovac, ugovorne vrijednosti 35.000KM, kao i projekat "ZPE09" koji je implementiran na mikrolokalitetu Gornja i Donja Majkića Japra, a omogućeno je priključenje za 29 stambenih jedinica, ugovorne vrijednosti od 265.000KM.

Sanacijom lokalnih puteva Demiri-Pećina u dužini od 578 m završen je projekat održivosti kroz obnovu komunalne infrastrukture "ZPOD09" u Bosanskom Petrovcu, a realizovano je 40.000KM.

U toku je projekat elektrifikacije povratničkih lokacija/objekata „ZPE09“ u Bosanskom Petrovcu, potpisan je ugovor za isporučioaca elektromaterijala i izvođača radova. Materijal je isporučen, završeni radovi (Komisija je općini odobrila utrošak neiskorištenih sredstava, te su u toku aktivnosti po pitanju implementacije ovih preostalih sredstava). Ugovoreno je ukupno 145.000KM.

U Sanskom Mostu, u okviru projekta održivosti kroz obnovu komunalne infrastrukture, asfaltira se lokalni put Tomine I i II, dužine 260 m. Završenost radova je 80%, a ugovoreno je oko 35.000KM. Također, u toku je asfaltiranje lokalnog puta Hatiraj-Jasica u MZ Donji Kamengrad, dužine 350 metara. Stepen završenosti radova je 45%, a ugovoreno je 10.000KM.

2. ODGOVOR

Nakon više od dvije godine od podnošenja prvog prijedloga Parlamentarnoj skupštini BiH od strane Vijeća ministara BiH, Revidirana Strategija Bosne i Hercegovine za provedbu Aneksa VII Dejtonskog mirovnog sporazuma koju je sačinilo Ministarstvo za ljudska prava i izbjeglice BiH, usvojena je tek polovinom prošle godine na 47. sjednici Doma naroda Parlamentarne skupštine BiH.

Strategijom se definiraju ciljevi i planiraju potrebne akcije i reforme u pravcu konačnog realiziranja odredbi Aneksa VII Općeg okvirnog sporazuma za mir u BiH (Sporazum o povratku izbjeglica i raseljenih osoba), i to: pravo na povratak, pravo na izbor drugog mjesta prebivališta i pravo na naknadu štete.

Isto tako identificirani su problemi i date brojne preporuke i prijedlozi mjera za unaprijeđenje stanja u oblastima sigurnosti, komunalne i socijalne infrastrukture, kao i na polju održivosti i reintegriranja povratnika u smislu pristupa pravima na zdravstveno osiguranje, obrazovanje, socijalnu zaštitu, penziono-invalidsko osiguranje itd.

U nastavku slijedi izvještaj o napretku u odnosu na identificirane probleme i preporuke za unaprijeđenje stanja u oblasti povratka i ostalih trajnih rješenja problema raseljavanja.

1. Suštinsko okončanje procesa održivog povratka u BiH

PREPORUKA

Na osnovu preciznih i pouzdanih pokazatelja, Ministarstvo za ljudska prava i izbjeglice BiH će, u saradnji s resornim entitetskim i drugim nadležnim institucijama, predložiti aktivnosti za realiziranje programa povratka u periodu od 2009. do 2014. godine, ne ograničavajući pritom rokove za pristup pravima svih onih koji u tom periodu ne riješe svoje interese.

ZAVRŠENE AKTIVNOSTI

- ✓ MLJPI izradilo Okvirni program za povratak izbjeglica i raseljenih osoba za period 2009 – 2014. godine kao Dodatak 1 Revidirane strategije
- ✓ Parlamentarna skupština usvojila koncept Programa, zajedno sa Strategijom
- ✓ Razvijena metodologija implementacije, uključujući predviđene aktivnosti sa jasnom podjelom uloga i odgovornosti
- ✓ Napravljena procjena potrebnih sredstava i očekivanih rezultata
- ✓ Podaci o povratku i korisnicima pomoći u posljednje dvije godine (2009/2010) prikupljeni od općina i implementing agencija i donatora

TEKUĆE AKTIVNOSTI

- ✓ Konsolidacija baze podataka o korisnicima pomoći za povratak i izrada statistika nakon ažuriranja podataka o potencijalnim korisnicima programa, zajedno s procjenom preostalih potreba za suštinsko okončanje procesa održivog povratka u BiH - razloženo po općinama povratka

PLANIRANE AKTIVNOSTI

- ✓ Priprema godišnjih akcionih planova za provedbu Programa (UČESNICI: Općine u saradnji s relevantnim entitetskim/ kantonalnim ministarstvima uz koordinaciju MLJPI)

2. Nediskriminatoran pristup izbjeglica, raseljenih osoba i povratnika pravima iz Aneksa VII Dejtonskog mirovnog sporazuma

PREPORUKA

Potrebne su reforme pravnog okvira kojima će se osigurati jednakopravan pristup pravima izbjeglica, raseljenih osoba i povratnika u formalnom statusu i svih onih koji su *de facto* raseljeni.

Sve nadležne institucije u Bosni i Hercegovini će u cilju konačnog i potpunog rješavanja pitanja izbjeglica i raseljenih osoba i povratnika omogućiti ostvarivanje sva tri prava iz Aneksa VII Dejtonskog mirovnog sporazuma i to: pravo na povratak, pravo na slobodan izbor mjesta življenja i pravo na naknadu štete u skladu sa Aneksom VII Dejtonskog mirovnog sporazuma.

ZAVRŠENE AKTIVNOSTI

- ✓ MLJPI izradilo teze za novi, okvirni Zzakon o izbjeglicama i raseljenim osobama s obzirom na činjenicu da su izmjene i dopune sadašnjeg Zakona bile mnogobrojne jer su predviđene i razvijene odredbe za pristup pravima na izbor prebivališta i naknadu štete
- ✓ Unutrašnji proces konsultacija obuhvatio je sve sektore MLJPI
- ✓ Prvi nacrt je dostavljen kabinetu ministra na daljnji postupak

PLANIRANE AKTIVNOSTI

- ✓ Konsultacije o nacrtu Zakona s nadležnim institucijama: Federalnim ministarstvom raseljenih osoba i izbjeglica, Ministarstvom za izbjeglice i raseljena lica RS, Odjelom za raseljene osobe, izbjeglice i stambena pitanja Vlade Brčko Distrikta BiH i UNHCR-om u BiH, prije prosljeđivanja konačnog nacrtu kao prijedloga Vijeću ministara BiH i PS BiH

3. Osiguranje preduslova za povratak kroz rekonstrukciju preostalih uništenih i oštećenih stambenih jedinica izbjeglica, raseljenih osoba i povratnika

PREPORUKA

Osigurati sredstva za sanaciju uništenih i/ili neuslovnih stambenih jedinica u skladu sa propisanim minimumom stambenih uslova za sve one koji ispunjavaju kriterije za dobivanje pomoći za obnovu, uz davanje prednosti najugroženijim osobama, prije svega:

- povećanim izdvajanjem u proračunima svih nivoa vlasti u BiH i
- aktivnim pristupom međunarodnoj i domaćoj donatorskoj zajednici

TEKUĆE AKTIVNOSTI

- ✓ Priprema za prelazak na "projektni pristup" u provedbi projekata povratka i koncentracija pomoći na mikro-lokalitete povratka u cilju smanjenja troškova, što će rezultirati većim brojem korisnika koji će biti pokriveni iz raspoloživih sredstava

PLANIRANE AKTIVNOSTI

- ✓ Razvoj jedinstvenog modela za općinske projekte i izrada uputa za popunjavanje obrasca
- ✓ Izrada projekata i podnošenje državnoj Komisiji za izbjeglice i raseljene osobe na odobravanje

Na kraju, u vezi sa ovom preporukom, posebno želimo istaknuti da je Ministarstvo za ljudska prava i izbjeglice BiH u svom zahtjevu da odobrenje sredstava iz budžeta za 2011. godinu blagovremeno iskazalo potrebe za finansiranje prava iz Aneksa VII DMS.


Tim zahtjevom predložili smo da se, u skladu sa dinamičkim Planom za suštinsko okončanje procesa povratka do kraja 2014. godine, usvojenim od strane Vijeća ministara i Parlamentarne skupštine BiH, osiguraju sredstva u ukupnom iznosu od 308.120.000 KM, što predstavlja zbir iznosa nedostajućih sredstava iz 2010. godine (109.620.000 KM) i neophodna sredstva prema Okvirnom programu povratka za 2011. godinu (198.500.000 KM).

Dodatno, tražili smo izdvajanje inicijalnog iznosa od 50 mil.KM za potrebe naknade štete za imovinu koja se ne može vratiti raseljenim osobama i izbjeglicama.

Međutim, koliko se pitanja realizacije Aneksa VII DMS još uvijek drže na izuzetno niskom nivou u pogledu značaja i prioritiziranja kada je u pitanju njihovo finansiranje, evidentno je u činjenici da je ove godine, prilikom predlaganja budžeta, Nacrt zakona o budžetu institucija BiH i međunarodnih obaveza BiH za 2011. godinu startovao sa iznosom od nula konvertibilnih maraka, da bi na sjednici Vijeća ministara BiH, na intervenciju ovog Ministarstva, sredstva za ove namjene bila korigovana na 10 miliona KM, nakon čega je Predsjedništvo, kao ovlaštenu predlagač budžeta prema PS BiH, u Nacrtu zakona utvrdilo nešto viša, ali još uvijek nedovoljna sredstva, u iznosu od svega 17 miliona KM.

Broj: 09-49-1100/13
Sarajevo, 01.07.2013. godine

PARLAMENTARNA SKUPŠTINA
BOSNE I HERCEGOVINE
ZASTUPNIČKI DOM/PREDSTAVNIČKI DOM



SARAJEVO

PREDMET: Poslaničko pitanje, odgovor – dostavlja se.-

Veza: Vaš akt broj: 01/a-50-1-15-43/13 od 28.02.2013. godine

U vezi sa poslaničkim pitanjem, koje je na 43. sjednici Zastupničkog doma Parlamentarne skupštine Bosne i Hercegovine, održanoj 28.02.2013. godine postavio zastupnik Nermin Purić, koje glasi:

„U kojoj je fazi provedba Zakona o principima lokalne samouprave Federacije BiH, da li se on provodi, te kada se očekuje potpuni prenos prava i obaveza jedinicama lokalne samouprave, posebno u oblasti obrazovanja i zdravstvene zaštite? Kakvo je stanje provedbe ovog zakona u kantonima u Fedraciji BiH sa posebnim osvrtom na Unsko-sanski kanton?“.

Federalno ministarstvo pravde daje slijedeći:

ODGOVOR

Odredbom člana 8. stav 3. tačka 13., 14. i 16. Zakonom o principima lokalne samouprave u Federaciji Bosne i Hercegovine („Službene novine Federacije BiH“, br. 49/06 i 51/09) propisano je da u vlastite nadležnosti jedinice lokalne samouprave posebno spada „utvrđivanje politike predškolskog obrazovanja, unapređenje mreže ustanova, te upravljanje i finansiranje javnih ustanova predškolskog obrazovanja, osnivanje, upravljanje, finansiranje i unapređenje ustanova osnovnog obrazovanja, kao i ocjenjivanje rada ustanova i kvaliteta usluga u djelatnosti zdravstva, socijalne zaštite, obrazovanja, kulture i sporta, te osiguranje finansijskih sredstava za unapređenje njihovog rada i kvaliteta usluga u skladu sa potrebama stanovništva i mogućnostima jedinice lokalne samouprave“.

Odredbom člana 58. Zakonom o principima lokalne samouprave u Federaciji Bosne i Hercegovine propisano je „Danom stupanja na snagu ovog zakona prestaje da važi Zakon o osnovama lokalne samouprave (“Službene novine Federacije BiH”, broj 6/95).

Federacija Bosne i Hercegovine i kantoni dužni su da usklade svoje zakone sa ovim zakonom, te da izvrše prenos poslova i nadležnosti, kao i odgovornosti

dodijeljenih jedinicama lokalne samouprave ovim zakonom, u roku od šest mjeseci od dana njegovog stupanja na snagu.

Jedinice lokalne samouprave dužne su da usklade svoje statute sa ovim zakonom u roku od 12 mjeseci od dana njegovog stupanja na snagu.

Stupanjem na snagu ovog zakona prestaju da važe odredbe kantonalnih zakona o lokalnoj samoupravi i odredbe statuta jedinica lokalne samouprave koje su u suprotnosti sa odredbama ovog zakona".

Odredbom člana 59. Zakonom o principima lokalne samouprave u Federaciji Bosne i Hercegovine propisano je da „Prenos poslova i nadležnosti dodijeljenih ovim zakonom, kao i odgovornost jedinica lokalne samouprave za njihovo vršenje, počće istovremeno sa prenosom sredstava potrebnih za njihovo obavljanje”.

Federalno ministarstvo pravde je prikupilo podatke od kantonalnih ministarstava pravde povodom postavljenog poslaničkog pitanja, te ističe slijedeće:

1. Unsko – sanski kanton, je donio Zakon o lokalnoj samoupravi Unsko – sanskog kantona (“Službeni glasnik Unsko – sanskog kantona”, broj: 8/11). Članom 12. kantonalnog zakona određene su vlastite nadležnosti jedinica lokalne samouprave, koje su u potpunosti usklađene sa nadležnostima propisanom u članu 8. Zakona o principima lokalne samouprave u Federaciji Bosne i Hercegovine („Službene novine Federacije BiH”, br. 49/06 i 51/09).

2. Posavski kanton, nije izvršio usklađivanje svog Zakona o lokalnoj samoupravi sa Zakonom o principima lokalne samouprave u Federaciji Bosne i Hercegovine.

3. Tuzlanski kanton, je nakon donošenja Zakona o principima lokalne samouprave u Federaciji Bosne i Hercegovine, donio Zakon o prestanku važenja Zakona o lokalnoj samoupravi Tuzlanskog kantona („Službene novine TK”, broj: 13/07), te se poslije toga direktno primjenjuje federalni Zakon.

4. Zeničko – dobojski kanton, nije izvršio usklađivanje svog Zakona o lokalnoj samoupravi sa Zakonom o principima lokalne samouprave u Federaciji Bosne i Hercegovine. Isto tako nije bilo prenosa prava i obaveza jedinica lokalne samouprave u pitanjima iz člana 8. Zakona o principima lokalne samouprave u Federaciji Bosne i Hercegovine. Napomenuli su da je Skupština Zeničko-dobojskog kantona donijela Zakon o prenosu nadležnosti Zeničko-dobojskog kantona, djelatnost osnovnog i srednjeg obrazovanja na Općinu Žepče („Službene novine ZDK”, broj: 12/09).

5. Bosansko-podrinjski kanton, nije izvršio usklađivanje svog Zakona o lokalnoj samoupravi sa Zakonom o principima lokalne samouprave u Federaciji Bosne i Hercegovine.

6. Srednjobosanski kanton, za ovaj kanton nismo uspjeli ni poslije naše urgencije da prikupimo potrebne podatke.

7. Hercegovачko – neretvanski kanton, nije izvršio usklađivanje svog Zakona o lokalnoj samoupravi sa Zakonom o principima lokalne samouprave u Federaciji Bosne i Hercegovine.

8. Zapadnohercegovачki kanton, je donio Zakon o lokalnoj samoupravi Zapadnohercegovачkog kantona (“Narodne novine Zapadnohercegovачkog kantona”, br. 8/09 i 18/11). Članom 14. kantonalnog zakona određene su vlastite nadležnosti jedinica lokalne samouprave, koje su u usklađene sa nadležnostima propisanim u članu 8. Zakona o principima lokalne samouprave u Federaciji Bosne i Hercegovine („Službene novine Federacije BiH”, br. 49/06 i 51/09).

9. **Kanton Sarajevo**, nije izvršio usklađivanje svog Zakona o lokalnoj samoupravi sa Zakonom o principima lokalne samouprave u Federaciji Bosne i Hercegovine.

10. **Kanton 10**, nije izvršio usklađivanje svog Zakona o lokalnoj samoupravi sa Zakonom o principima lokalne samouprave u Federaciji Bosne i Hercegovine.

Napominjemo, da na pitanje u kojoj mjeri je izvršen prijenos prava i obaveza jedinicama lokalne samouprave, posebno u oblasti obrazovanja i zdravstvene zaštite, nismo dobili odgovor niti od jednog kantona, osim, Zeničko-dobojskog kantona koji su istakli da je Skupština Zeničko-dobojskog kantona donijela Zakon o prenosu nadležnosti Zeničko-dobojskog kantona, djelatnost osnovnog i srednjeg obrazovanja na Općinu Žepče.

S poštovanjem.



MINISTAR

Zoran Mikulić

Dostaviti:

1. Naslovu,
2. U registar,
3. Arhivi.